



Selasa, 3 Agustus 2021
Ogen: ESEKIEL 10:6-22



leleh Dibata Kerina



Banci jadi mesera siakap ngantusi kai siituriken ibas Bogenta sekalienda. Secara sederhana, ogenta enda ncidahken uga kemulian Tuhan enggo nadingken Rumah Pertoton. Adi jaman benaken jaman Musa seh jaman raja-raja lit kap kiniteken bangsa Israel, maka adi je denga peti perpadanen, maka kemulian Tuhan ringan dengan I Jerusalem. Selama kemulian e lit ije, bangsa Israel maju, bayak, la tertaluken. Kejayaan, kemakmuren ras kemenangen arah musuh nari ngatakenca maka bangsa e ipasu-pasu Tuhan. Tapi kenca ieteh Dibata kerina maka sada pe lanai lit erkemalangen man bana. Bangsa si ndube i kep-kepNa gundari ateNa ikernepkenNa alu api siibuat ibas malekat kerubim nari. Kenca bage lawes kemulian Tuhan arah sebelah timur dalam kudarat Rumah Pertoton e.

Jerusalem iukum bali ras Sodom ras Gomora, ikernepken alu api sinusur i langit nari. Ijenda icidahken maka Tuhan tuhu-tuhu adil ras bujur. Lanai hak istimewa man bangsaNa adina isea-seakenna nge perkuah ate Tuhan e alu nggeluh ibas dosa ras mperdua-dua Dibata. I lebe-lebe Dibata nggo seri luatna bangsa e ras bangsa si la nandai Dibata.

Jadi pertenget man banta kerina, nina Tuhan Yesus, ibas Matius 7:21 "labo kerina kalak si erlebuh man bangKu, 'o Tuhan, Tuhan!', bengket kubar kinirajan surga, tapi kalak si ngelakoken rikutken si ngena ate bapangKu I surge nge bengket kubar kinirajan e". Emaka itandai Tuhan nge bangsaNa. Ise kin bangsa Tuhan e? Eme sindalanken kerina peratenNa. Labo terjeng megi-megi ntah nuri-nuri kerna Tuhan e, tapi pe makeken alu patuh kerina si perentahkenNa. Rumah Tuhan lalap nge ibersihken alu erbage-bage percuban ras kiniseran, bagepe arah pengajaren-pengajaren palsu. Ise si tetap ibas Tuhan, ieteh Dibata nge kerina.